



**Lucia Alpiger e ses iert da flurs**

*A Gula tranter Glion e Rueun tgi-ra Lucia Alpiger dapi set onns in iert da fluras plain colur.*

6



**Open air a Sclamischo**

*Tranter Strada e Martina ha gi lieu da curt in open air da musica per tut las ureglias.*

11

südostschweiz

# LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch



Ilis investuors da l'Hotel Schweizerhof a Vulpera voutan mantgnair la sub-stanza istorica e'l caracter oriund dal stabilimaint. FOTO A. FILLI

## Scuol douvra augmoint da las pernottaziuns

■ (anr/afi) Divers progets per la renovaziun dad hotels o dafatta per novs fabricats a Scuol spettan da pudair gnir realisats. Ilis respunsabels da l'Hotel Palace a Nairs prevezan da drivir la part renovada da l'hotel per la prosma stagiun d'inviern. La gruppa d'investuors hollandaisa LMEY Investments vout realisar in l'Hotel Schweizerhof a Vulpera 90 abitaziuns economisadas. Sco cha'l capo cumünal da Scuol, *Christian Fanzun*, disch as prevezza qua da

cumanzar prosma prümavaira cun las lavuors da renovaziun. Plünavant ha'l manzunà cha'ls recuors inoltrats cunter il proget dal resort a Sotrachögna nu sajan gnüts acceptats. Fanzun es persvas cha Scuol douvra urgjainta-maing novs lets chods, quai eir per ragiundscher darcheu ün bun equiliber tant pro'l commerzi sco eir pro la mansteranza da la regiun.

> PAGINA 11

## Cup mundial era 2019?

L'aura ha fatg in streh atras il quen dils organisateurs dil Cup mundial da parasgular a Mustér

DA HANS HUONDER / ANR

■ Il Cup mundial da parasgular l'jamna vargada a Mustér ha pitiu dalla schliat'aura. Cun in program da rama han ils organisateurs tonaton saviu tener da buna luna las participontas ed ils participonts. Durent l'entira jamna eis ei stau pusseivel da sgular sulet-tamein treis dis. Sper in di da trenament ei quei era stau dus dis da concurrenza. Il secund ei staus la sonda e lu ha la partenza saviu succeder pér allas 16.00. Malgrad la schliat'aura durent l'entira jamna tilan ils organisateurs ina bilanza positiva. «Senza bun'aura eis ei buca pusseivel da sgular. Persuenter havein nus offeriu allas participontas ed als participonts in program da rama. Aschia han els empriu d'enconuscher la regiun ord in'otra vesta», di il president dils Surselva Flaigers *Marc Demont* che han organisau il cup mundial comunablamain cun Disentis Open. La schliat'aura ha pretendiu dils organisateurs in bien maun, buca mo concernent l'informaziun dils parasguladers, mo-bein era dils voluntaris ch'ei stai involvi. A Mustér duei vegnir cun-



Il gliendisdis dall'jamna vargada han ils parasguladers giu relaziuns da sgular optimalas. FOTO M. SCHEEL

tinuau cun concurrenzas naziunalas ed internaziunalas da parasgular. «Nus havein gia decidiu d'arranschar il campinadi svizzer igl

onn vegnent. Il proxim temps vengnin nus era a sefatschentar dalla damonda d'organisar il cup mundial a Mustér igl onn 2019»,

di Demont enviars l'Agentura da novitads rumantscha.

> PAGINA 5



Sin il podest tar ils giuivens: Flavia Capeder, Silvan Arquint e Dominik Oberli (da san.). FOTO G. N. STGIER

## Sajettà bain e precis

■ (anr/gns) Dapi 37 onns è il di chantunal dals tiradurs giuivens il punct culminant da la stagiun per la generaziun giuvna da tir grischuna. Gi lieu ha quel sonda al stan da tir regional «Landgut» a Tavau cun ina participaziun da 90 mats e mattas. *Silvan Arquint* da Scuol è il meglier tiradur giuiven da noss chantun sin la distanza da 300 meters. Tar ils giuivenils ha *Gianluca Schucany* da Ftan gu-

dagnà la concurrenza. *Flavia Capeder* da Duin e *Franco Levy* da Sedrun han omadus cuntanschi il segund post. Tar ils giuivens ha la gruppa da Bravuogn obtegnì l'emprim post e quai cun 722 puncts. Tar ils giuivenils è la gruppa da Sent stada la pli ferma cun far 495 puncts e daventar campionessa grischuna.

> PAGINA 9

## Claudia Caviezel – la designra dal pavillon svizzer

■ (anr/vi) Per in'artista u designra èsi in'onur d'astgar concepir la cumparsa d'in pajais ad ina exposiziun mundiala. Quest onn ha Claudia Caviezel procurà per la preschient-scha artistica da la Svizra a l'expo a Kasachstan. Ensem cun in atelier da la Romandia ha ella illustrà la fatschada dal pavillon svizzer e cumponì las projecziuns da glisch en l'intern. La fatschada bunamain sburffa da colurs e moviments e cuntegna blers elements tradiziunals: costumes, vatgas, ma cunzunt era culms, vals, aua e vent. Quai sa cumporta bain cun «Energia ed avegnir», la tematica da l'exposiziun mundiala, ed ils intents dals exposituors svizzers. Lezs vulan demonstrar lur know how puncto regenerabladad ed effizienz d'energia. La presidenta da la confederaziun *Doris Leuthard* è stada il venderdi passà a l'exposiziun mundiala ed ha visità il pavillon svizzer ensem cun ina delegaziun da Kasachstan.

> PAGINA 2

## 172 mummas e pigns en surcombras

Ilis rinolofs gronds han bardigliau da Castrisch a Sagogn

DAD AUGUSTIN BEELI / ANR

■ Igl ei animalets discrets che sgolan la notg e fan donn a negin. Els peisan denter 18 e 24 grams, senutreschan d'insects gronds. Lur num: rinolof grond, ina specia da miezmiur e miezutschi. Mintga sera sgolan els ora a Sagogn. El surcombras dalla baselgia reformada da Sagogn traian questa stad puspei las femellas si ils pigns. «Igl ei la pli impurtanta colonia da rinolofs gronds en Svizra, conferma *Miriam Lutz* all'anr. Questa stad han la zoologa ed experta da miezmiur e miezutschi e siu consort *Erich Mühlethaler* dumbräu 172 exemplars. Ilis davos diesch onns ei l'entira colonia sestabilisada el surcombras dalla baselgia reformada da Sagogn. Igl onn vargau, ina sera da mesastad, allas 21.15, aveva il redactur dall'anr dumbräu leu enteifer ina mes'ura 121 exemplars ch'ei sgulai ora. La stad 2017 eis ei pia 172. Igl ei femellas, bunamein la mesadad cun in pign, che tezzan. L'incumben-



Il rinolof grond ha alas da circa 37-40 centimeters, sia fatscha semeglia in fier-cavagl, perquei siu num tudestg «Grosse Hufeisenmase».

FOTO E. MÜHLEHALER

sadra pil schurmetg dils miezmiur e miezutschi el Grischun tgira ed observa la colonia ch'ei da grond'impurtonza pil Grischun.

Svaness quella svaness era in ton dalla diversità da specias.

> PAGINA 3



20033

Servetsch d'abunents e da distribuziun: tel. 0844 226 226 mail: abo@somedia.ch

9 771424 749004